

La'ó Hamutuk

Institutu Timor-Leste ba Monitor no Analiza Dezenvolvimentu

Rua Dom Alberto Ricardo, Bebora, Dili, Timor-Leste

Tel: +670-77234330 (mobile) email: laohamutuk@gmail.com

Website: www.laohamutuk.org



Dili, 10 Juñu 2022

Komentáriu husi La'ó Hamutuk ba Enkontru Parseiru Dezenvolvimentu Timor-Leste 2022

“Iha Nesesidade Urjente atu avansa ho dalan ba harii reziliénsia popular ba tempu naruk.”

Introdusaun

La'ó Hamutuk nudár organizasaun Sosiedade Sivil ne'ebé liu dékada rua, partisipa ativu iha prosesu konstrusaun no dezenvolvimentu Timor-Leste nian, liu husi monitoring, analiza no halo advokasia bazeia ba evidénsia no polítika públiku Timor-Leste nian. La'ó Hamutuk mós asume papél hodi fahe informasaun oin-oin ba povu atu bele iha kbiit hodi enfrenta dezafiu sira nudár Estadu no Nasaun, no atu fahe informasaun no perspetiva sira ba ukun-na'in sira iha Governu no parseiru dezenvolvimentu sira.

Ami apresia inisiativa Governu nian ba organiza reuniaun parseiru dezenvolvimentu iha tinan ida ne'e hodi diskute asuntu sira importante ba Timor-Leste nia futuru ida ne'ebé reziliente no sustentável liu. Hein katak parte hotu iha enkontru ida ne'e, bele diskute ho kle'an, realistíku no sériu liu hodi hamutuk define dalan ne'ebé loos liu ba futuru di'ak povu Timor-Leste nian.

Aproveita tempu ida ne'e, hato'o agradesimentu ba kontribuisaun hotu ne'ebé parseiru dezenvolvimentu sira oferese iha momentu difisil hotu povu Timor nian inklui krize saúde no dezastre naturais dala rua tuituir malu iha istória ikus Timor-Leste nian.

Situasaun atuál Timor-Leste nian

Fundu Petrolíferu sei mamuk lalais.

Diskusaun no previzaun sira ne'ebé resposta husi Orsamentu Retifikativu 2022 no Proposta Lei Grande Opsaun do Planu ba OGE 2023, husik hela mensajen prinsipál ba ita hotu katak Fundu Petrolíferu sei hotu lalais liu sein investe ba interese Povu Timor-Leste nian ba tempu naruk.

Agora, produsaun Bayu-Undan besik atu remata, no laiha kampu seluk pruntu atu fornese reseita. Durante Janeiru-Abril 2022, valor investimentu iha Fundu Petrolíferu tun 10% (\$1.6 biliaun). Maske Ministériu Finansas inklui projesaun grave kona-ba presipiu financeiru (*fiscal cliff*) iha Lei Grande Opsaun do Planu ba OGE 2023 ne'ebé foin pasa husi Parlamentu Nasionál, realidade katak situasaun ida ne'e bele mosu lalais liu kompara ho sira nia estimizasaun.

Situasaun ida ne'e fó ameasa ba ita nia nasaun no bem-estar povu nian, tanba ita nia kapasidade atu finansia setór báziku hanesan saúde no edukasaun, sei perigozu tebes bainhira Fundu Petrolíferu kuaze mamuk ona. Situasaun ida ne'e bele mós fó ameasa ba ita nia soberania, se Governu decide atu foti empréstimu ne'ebé Timor-Leste sei susar atu selu fali.

Diversifikasaun Ekonómiku Seidauk Realiza.

Ami haree iha tendénsia atu kontinua gasta osan ba Projetu Tasi Mane no projetu boot sira seluk ne'ebé nia retornu nafatin iha duvida, too agora seidauk klaru ba benefísiu husi Projetu Tasi mane ba ekonomia Timoroan nian ba tempu naruk no laiha evidénsia katak portu no aeroportu sira sei sai oportunidade atu dezenvolve ekonomia Timor-Leste nian.

Tendénsia atu investe iha projetu boot sira ne'ebé falta atu hamosu diversifikasaun ekonómiku ne'ebé sustentável, ida ne'e lori konsekuénsia ba ita nia nasaun atu depende nafatin ba importasaun. Kada tinan, Timor-Leste importa sasán ho valór kuaze tokon \$500. Esportasaun naun-petrolíferu maizumenus tokon \$20 kada tinan. Produsaun ai-han lokál la suficiente atu hasoru nesiedade populaun.

To'ó agora, Timor-Leste kobre défise komérsiu ida ne'e ho osan husi reseita petrolíferu no retornu investimentu. Maibé ne'e la'ós solusaun sustentável, tanba hanesan ita hatene ona Fundu Petrolíferu bele mamuk iha tinan sanulu tuir mai.

Bainhira Fundu mamuk ona, nasaun ne'e sei la bele selu importasaun barak no impaktu ba povu sei todan liu tan se produsaun ai-han lokál seidauk aumenta maka'as. Agora, maioria husi populaun la iha seguransa ai-han¹, no tuir estudu Índise Hamlaha Globál maioria husi labarik ho idade menus husi tinan lima iha Timor-Leste ho kondisaun isin ra'es badak (*stunted*).² Se situasaun ida ne'e sai grave liu, oinsá ho nia impaktu ba povu? Diversifikasaun ekonomia la'ós asuntu abstratu de'it - ne'e fó impaktu maka'as ba povu nia moris.

Mudansa klimátika halo situasaun ida ne'e grave liu tan.

Mundu tomak preokupa maka'as kona-ba mudansa klimátika, ida ne'ebé kria husi indústri boot sira inklui produsaun mina no gas ne'ebé hasai gas estufa hodi estraga klima no rezulta krize umanu oin-oin iha mundu rai klaran inklui Timor-Leste. Timor-Leste la ketak husi planeta mundu nian, ida ne'ebé hetan efeitu no kontribui mós ba mudansa klimátika ne'ebé umanidade mundiál enfrenta.

Impaktu husi mudansa klimátika bele halo problema balun ne'ebé ita enfrenta hela sei sai todan liu tan, inklui inseguransa ai-han, produsaun agrikultura menus, asesu ba bee moos no kualidade infrastrutura. Ita la bele adapta-an nafatin ba situasaun ne'ebé kontinua sai grave liu tan, no presiza esforsu husi nasaun boot sira (inklui doadór) atu hamenus sira nia emisaun gás estufa.

Rekomendasaun ba Parseiru Dezenvolvimentu sira

- Aumenta investimentu ba ekonomia produtivu, ne'ebé orienta ba konsumu doméstiku. Ami hanoin katak Timor-Leste bele iha liu tan kbiit atu enfrenta situasaun aat oin-oin iha futuru kuandu ita harii duni ekonomia ida ne'ebé produtivu no sustentável. Ami husu doadór sira atu foka liu ba produsaun agrikultura ne'ebé bele responde ba krize seguransa ai-han no nutrisaun. Liu husi hametin sistema produsaun skala-ki'ik ne'ebé eziste ona, no valoriza kapasidade, forsa no vontade inklui kondisaun ba atividade ne'ebé eziste ona iha populaun, doadór sira bele maximiza benefísiu ba povu tomak.
- Investe atu haforsa no hametin Timor-Leste nia rekursu ho valor boot liu – ita nia povu. Atu la'ó ba futuru, Timor-Leste presiza apoiu husi doadór sira atu hadi'ak liu tan ita nia sistema

¹ <https://www.ipcinfo.org/ipc-country-analysis/details-map/fi/c/1151924/?iso3=TLS>

² <http://laohamutuk.blogspot.com/2020/11/rezultadu-husi-global-hunger-index-2020.html>

edukasaun no saúde, no atu hamenus kedas malnutrisaun no pobreza. La ho povu ne'ebé forte, liuliu joven no labarik sira, ita nunca bele harii nasaun forte.

- Ajuda polítiku na'in sira atu kompriende katak indústría estrativa sira – petróleu, mineiru – labele fornese osan no empregu adekuaadu ba Timor-Leste, no sei labele sustenta ekonomia no orsamentu estadu iha futuru. Ita tenke hamenus atensaun ba fantasia ida ne'e, no halo esforsu maka'as atu dezenvolve ekonomia sustentável, bazeia ba rekursu umanu no renovavel sira ne'ebé ita iha duni – povu, agrikultura, indústría transformadóra, dezenvolve fatin turístiku komunitáriu inklui poténsia seluk ne'ebé bele adopta tuir karakterístika Timor-Leste nian rasik.
- Parseiru dezenvolvimentu sira bele rekoñese realidade atuál Timor-Leste nian no kontinua aliña an iha prioridade no nesesidade loloos ne'ebé povu no nasaun ne'e prezisa. Ami sujere atu kontinua ho inisiativa di'ak atu fó apoiu ba hirak ne'ebé marzinalizadu hanesan fetu sira, hirak ne'ebé moris kbiit laek iha área rurál, ema ho defisiénsia, labarik sira ne'ebé ho kondisaun malnutrisaun, sira ne'ebé seidak hetan asesu ba edukasaun no asesu ba saúde ho di'ak no adekuaadu. Nune'e, povu hotu iha área remota sira ne'ebé falta atensaun ka seidak hetan asisténsia bele moris ho kondisaun ne'ebé di'ak liu no equitável liu.
- Ami husu Doadór hotu atu aliña sira nia programa kona-ba adaptasaun ba mudansa klimátika ho sira nia nasaun ida-idak nia polítika rasik. Dalan efetivu liu ba hasoru krize mudansa klimátika mak nasaun industrializadu sira tenke hamenus kedas sira nia emisaun. La bele husu nasaun ki'ik hanesan Timor-Leste atu adapta aan nafatin ba situaun ne'ebé nasaun industrializadu kontinua atu prolonga.
- Parseiru Dezenvolvimentu sira bele ajuda Governu atu atualiza dados importante sira ne'ebé bele ajuda Governu dezenvolve polítika bazeia ba evidénsia, inklui halo analiza ba planu programa sai realistíku liu. Hanesan: Demographics and Health Survey ikus halo iha 2016, Household Income and Expenditure Survey halo iha 2011, Living Standards Survey iha 2014 no Labor Force Survey kompletu iha 2013.

Konkluzan

Ami apresia tebes ba vontade máxima husi parseiru sira ne'ebé hakarak apoia nasaun ida ne'e no nia povu. Nune'e ami sujere atu suporta ami nia desizor sira ba diresaun ida ne'ebé bele ajuda eleva kapasidade umanu liu-liu hirak ne'ebé marzinalizadu no hakbiit ami nia ekonomia rai laran hodi hametin liu tan ba konsumu doméstiku. Aleinde ne'e, bele nafatin fó asisténsia ba ami nia rai ne'ebé vulneravel tebes ba risku mundiál atu reforsa ami nia reziliénsia ne'ebé bele garante ba moris sustentável liu.

Mak ne'e de'it ami nia karta, agradese ua'in ba ita-boot sira nia atensaun no kooperasaun.

Ami be saran lia,

Celestino Gusmão Pereira

Elizaria Febe Gomes

Bree Ahrens

Charles Scheiner

Marta da Silva

Mariano Ferreira

Jonathan Gonsalves